

Abogadonan di e rumannan Kalpoe a tuma nota di declaracion di Beth Twitty

ORANJESTAD(AAN):

Despues cu mama di Natalee Holloway a tene su conferencia di prensa unda cu el a pidi pa mundo henter no laga e rumannan Kalpoe drenta cualkier pais, DIARIO a contact abogado Oomen, kende ta abogado di

Deepak Kalpoe, pa haya sa kico e ta pensa di e declaracion di Beth Twitty.

El a splica cu e ta compronde cu dolor di e mama ta afecta su emocionnan, sinembargo sra Twitty mester respeta nos estado di derecho, mescos cu

nos ta respeta e estado di derecho di Merca.

Tambe DIARIO a yama oficina di abogado David Kock kende ta representa Satish Kalpoe, unda cu su colega Elgin Zeppenfeldt a

splica cu nan a tuma nota di palabranan di e mama y cu nan ta formulando un comunicado, pa reacciona riba declaracion di parti di Beth Twitty.

Segun Zeppenfeldt, huez a

splica caba cu e basenan di sospecho cu tabata tin na inicio contra di e rumannan Kalpoe no tey mas, pues ningun hende tin derecho di yama e muchanan aki pa criminal.

Compania "V" di Merca ta desapunta cu nan no worde permiti di yuda den caso Natalee Holloway

ORANJESTAD(AAN):

DIARIO a ricibi un comunicado di un compania Mericano "V".

Representante di e compania Jayson Schkloven a splica DIARIO cu e compania ta specializa den "layered voice analysis", cu ta un manera hopi sofistica pa examina pensamiento y emocionnan di un persona, despues cu su stem a worde graba, durante por ehempel un interrogacion.

Segun Schkloven e tecnica aki a worde desaroya na Israel 8 aña pasa y Merca ta usando esaki 2 aña caba.

Representante di e compania a splica cu den testnan di laboratorio e resultado tabata 100% sigur, mientras cu testnan di

casonan real tabata 97% efectivo.

Segun Schkloven e compania tabata tin contacto cu e famia di Natalee Holloway, desde cu representantenan a yega Aruba algun tempo pasa.

El a bisa tambe cu apesar cu e compania a haya permiso di Gobierno di Aruba pa actua como consehero durante e investigacion di caso Holloway, nan no ta worde permiti di parti di cuerpo policial y Ministerio Publico pa yuda den e investigacion aki.

Representante di V a bisa DIARIO cu nan lo ta bandonando Aruba dentro di algun dia, pero ta spera cu na un of otro manera nan por haya permiso di polis pa yuda cu e investigacion.